

四庫全書

經部

欽定四庫全書

周禮述註卷九

安溪李光坡撰

○載師掌任土之灋以物地事授地職而待其政令

註曰任土者任其力勢所能生育且以制貢賦也物
物色之以知其所宜之事而授農牧虞衡使職之
疏曰待其政令者謂因其職事使其賦貢即下經園
廛二十而一以下是

以廩里任國中之地以場圃任園地以宅田士田賈田
任近郊之地以官田牛田賞田牧田任遠郊之地以公
邑之田任甸地以家邑之田任稍地以小都之田任縣
地以大都之田任疆地

註曰鄭司農云民宅曰宅宅田者以備益多也士田
者士大夫之子得而耕之田也賞田者賞賜之田司
馬灋曰王國百里為郊二百里為州三百里為野四
百里為縣五百里為都杜子春云五十里為近郊百

里為遠郊玄謂廛里者若今云邑里居矣廛民居之
區域也里居也圃樹果蓏之屬季秋於中為場樊圃
謂之園宅田致仕者之家所受田也士相見禮曰宅
者在邦則曰市井之臣在野則曰草茅之臣士讀為
仕仕者亦受田所謂圭田也孟子曰自卿以下必有
圭田圭田五十畝賈田在市賈人其家所受田也官
田庶人在官者其家所受田也牛田牧田畜牧者之
家所受田也公邑謂六遂餘地天子使大夫治之自

此以外皆然二百里三百里其上大夫如州長四百里五百里其下大夫如縣正是以或謂二百里為州四百里為縣云遂人亦監焉家邑大夫之采地小都卿之采地大都公之采地王子弟所食邑也壹五百里王畿界也皆言任者地之形實不方平如圖受田邑者遠近不得盡如制其所生育賦貢取正於是爾以廛里任國中而遂人職授民田夫一廛田百畝是廛里不謂民之邑居在都城者與凡王畿內方千里

積百同九百萬夫之地也有山陵林麓川澤溝瀆城郭宮室涂巷三分去一餘六百萬夫又以田不易一易再易上中下相通定受田者三百萬家也遠郊之內地居四同三十六萬夫之地也三分去一其餘二十四萬夫六鄉之民七萬五千家通不易一易再易一家受二夫則十五萬夫之地其餘九萬夫廛里也場圃也宅田也士田也賈田也官田也牛田也賞田也牧田也九者亦通受一夫焉則半農人也定受田

十二萬家也食貨志云農民戶一人已受田其家
衆男為餘夫亦以口受田如此士工商家受田五口
乃當農夫一人今餘夫在遂地之中如此則士工商
以事入在官而餘夫以力出耕公邑甸稍縣都合居
九十六同八百六十四萬夫之地城郭宮室差少涂
巷又狹於三分所去六而存一焉以十八分之十三
率之則其餘六百二十四萬夫之地通上中下六家
而受十三夫定受田二百八十八萬家也其在甸七

萬千家為六遂餘則公邑

賈音古 疆本字監

古銜反率音律

凡任地國宅無征園廛二十而一近郊十一遠郊二十而三甸稍縣都皆無過十二唯其漆林之征二十而五註曰征稅也言征者以共國政也鄭司農云任地謂任土地以起賦稅也玄謂國宅凡官所有宮室吏所治者也國稅輕近而重遠近者多役也園廛亦輕之者廛無穀園少利也古之宅必樹而壘場有瓜疏

曰上經言任地所在此經言地稅多少不同之事甸
稍縣都皆無過十二者但此四處出稅不同據上文
直言公邑任甸地則甸地之中兼有六遂矣其稍縣
都上文推言三等采地為井田助灋不見公邑則三
者之中皆有公邑此云十二者餘三等采地而言以
其鄉遂公邑皆為夏之貢灋故也漆林之稅特重以
其自然所生非人力所作故也

凡宅不毛者有里布凡田不耕者出屋粟凡民無職事

者出夫家之征

註曰鄭司農云宅不毛者謂不樹桑麻也布泉也宅不毛者有里布民無職事者出夫家之征欲令宅樹桑麻民就四業則無稅賦以勸之也玄謂宅不毛者罰以一里二十五家之泉空田者罰以三家之稅粟以共吉凶二服及喪器也民雖有閒無職事者猶出夫稅家稅也夫稅者百畝之稅家稅者出土徒車輦給繇役朱子曰宅不毛為其為亭臺也田不耕為

其為池沼也

閒音閑

以時徵其賦

坡謂賦田賦也大宰大府所謂九賦司會所謂以九賦之灋令田野之財用者也蓋惟正之供也會古

外反

問里布既仍鄭註則口泉之說是矣若以口泉為非則里布之註不仍矣曰朱子仍之坡何敢不仍或問里布朱子云亦不可考朱子莫考之坡何能

有考而有以易之饒氏云家征是力役之征夫征是粟米之征里布是布縷之征是不以布為泉也不以為泉而以為布縷與不毛之罰似得其倫類然本經凡言布者指泉為多獨於此為布縷饒氏之云亦未有他據也況一字而二三其解又解經之所深避乎仍而闕之不害為慎雖然三代遠矣里布或別有所指為口泉決非也

○問師掌國中及四郊之人民六畜之數以任其力以

待其政令以時徵其賦

國中及四郊六鄉之中自廛里至遠郊也掌六畜數者農事之本且祭祀養老之所必具車乘之所必役也政令賦役皆是也坡謂此所徵賦乃萬民之貢也大宰所謂九職大府所謂九功司會所謂以九功之灋令民職之財用者也亦稱賦者疏云賦其總名是也

凡任民任農以耕事貢九穀任圃以樹事貢草木任工

以飭材事貢器物任商以市事貢貨賄任牧以畜事貢
鳥獸任嬪以女事貢布帛任衡以山事貢其物任虞以
澤事貢其物

註曰貢草木謂葵韭果蓏之屬 疏曰大宰以九職
任萬民有職必有功有功即有貢故此論貢之灋也
分山澤為二者以山澤出貢不同故分為二以充八
通閒民為九耳貢其物者山澤出產多故不名一物
凡無職者出夫布

載師云任地則無職者惰農也有田不耕故罰重此
云任民則無職者遊手也勉以擇業故罰輕夫布者
以布代九穀與 吳幼清曰賦與貢異賦有常數貢
無常數此任民以八貢則隨其地產而貢之其無者
不强

○凡庶民不畜者祭無牲不耕者祭無盛不樹者無椁
不蠶者不帛不績者不衰

註曰掌罰其家事也盛黍稷也椁周棺也不帛不得

衣帛也不衰喪不得衣衰也皆所以恥不勉 盛音
成強上聲

○縣師掌邦國都鄙稍甸郊里之地域而辨其夫家人
民田萊之數及其六畜車輦之稽三年大比則以攷羣
吏而以詔廢置

註曰郊里郊所居也自邦國以及四郊之內是所主
數周天下也萊休不耕者郊內謂之易郊外謂之萊
善言近 呂伯恭曰先王自封建諸侯外有閒田散

在諸侯之國或謂諸侯有罪則削其地以為閒田若
有功則以閒田增封之天子平時各命王官以掌之
縣師掌邦國都鄙稍甸郊里之地域而兼天下之閒
田以總其目此皆古人封建相維之意

若將有軍旅會同田役之戒則受灋於司馬以作其衆
庶及馬牛車輦會其車人之卒伍使皆備旗鼓兵器以
帥而至

註曰受灋於司馬者知所當徵衆寡 邱氏曰作起

也起其衆庶馬牛車輦而後會其車人之卒伍人有
人之卒伍車有車之卒伍 坡謂下稍人註云縣師
受於司馬邦國都鄙稍甸郊里唯司馬所調帥而至
者帥而至司馬也

凡造都邑量其地辨其物而制其域

疏曰都大都小都邑家邑也物謂地所有也若地無
所有不可耕墾若山澤者不授之故王制云名山大
澤不以封

以歲時徵野之賦貢

坡謂野謂甸稍縣都也所徵貢與閭師同徵賦則貳

載師也

○遺人掌邦之委積以待施惠

疏曰此與下為總目也

鄉里之委積以恤民之難阨門闕之委積以養老孤郊里之委積以待賓客野鄙之委積以待羈旅縣都之委積以待凶荒

註曰委積者廩人倉人計九穀之數足國用以其餘
共之所謂餘瀾用也職內邦之移用亦如此也皆以
餘財共之少曰委多曰積鄉里鄉所居也囂阮猶困
乏也門闕以養老孤人所出入易以取餼廩也羈旅
過行寄止者待凶荒謂邦國所當通給者也 疏曰
鄉里據國中郊里即六鄉之民所居郊者賓客至郊
與主國使者交接因即與之廩餼故以待賓客也野
鄙者六遂在郊外曰野六遂有五百家鄙故以鄙表

六遂耳羈旅處處皆有獨於此見惠者甸地在二百里中於内外有羈旅皆得取之故獨見於此也云縣都不見家稍者則縣都中可以兼之特於此三處見凶荒者凶荒則畿内畿外皆有若畿外凶荒則入向畿内取之畿内凶荒則向畿外取之故於近畿三百里之外言待凶荒之事也

凡賓客會同師役掌其道路之委積凡國野之道十里有廬廬有飲食三十里有宿宿有路室路室有委五十

里有市市有候館候館有積

註曰廬若今野候徙有序也宿可止宿若今亭有室
矣候館樓可以觀望者也一市之間有三廬一宿

疏曰上經委積隨其所須之處而委積此經所陳委
積據會同師役行道所須故分布於道路 薛士龍

曰成周封建之制自諸侯祿地及祿士之外其閒田
之歸於公上者雖領於王官皆藏於天下故自都達
竟有委有積凡糗糧芻茭具焉以待軍旅攷之於詩

徹申伯土疆以峙其糧而左氏亦云衛取於相土之東都以會王之東蒐夫糧峙於申會蒐之備達於衛境天下之賦藏畧可覩矣 王氏曰遺人會同司役之委積邦之大用不領於大府者大府主邦中經費之用有品式式用之餘所餘猶多則隨道里之便收貯之卒然有急而用可無乏兼無餽餉輸輓之勞是以雖行千里而若衽席上過師也 庠音雅竟音境凡委積之事巡而比之以時頒之

疏曰言凡委積上二文委積之事是也以時頒之則以待者是也

○均人掌均地政均地守均地職均人民牛馬車輦之力政

均人所均地政以下總均畿內鄉遂及公邑政讀為征地征九賦也地守虞衡之屬地職農圃之屬二者九貢也力政人民則治城郭涂巷溝渠牛馬車輦則轉委積之屬政音征下同

凡均力政以歲上下豐年則公旬用三日焉中年則公旬用二日焉無年則公旬用一日焉

註曰豐年人食四鬴之歲也人食三鬴為中歲人食二鬴為無歲歲無贏儲也公事也旬均也讀如噐噐原隰之噐易坤為均今書亦有作旬者 疏曰此所均力政者即上人民之力政不通牛馬車輦 鬴房甫反噐音旬

凶札則無力政無財賦

無力政恤其勞也無財賦恤其乏困也財賦即九賦地政也疏曰此即廩人云不能人二鬴之歲

○不收地守地職不均地政

無財賦故不平計地征也非凶札之歲當斂賦乃均之耳獨言不均地政舉其重者其實地守地職既不收亦不均矣

三年大比則大均

註曰有年無年大平計之若久不脩則數或闕

○師氏掌以媿詔王

註曰告王以善道也文王世子曰師也者教之以事而諭諸德者也 呂伯恭曰程伊川謂後世知求治而不知正君知規過而不知養德蓋後世諫諍之官所以正君之惡者未嘗不設若從容和緩以養君之德者則闕焉師氏以媿詔王專以從容和緩養君之德不幸君有過則有保氏之官在故二官皆言王舉則從聽治亦如之使人君既有所養又有所畏所以

二者不可偏廢 嫩音美

以三德教國子一曰至德以為道本二曰敏德以為行本三曰孝德以知逆惡教三行一曰孝行以親父母二曰友行以尊賢良三曰順行以事師長

註曰德行內外之稱在心為德施之為行孝在三德之下三行之上德有廣於孝而行莫尊焉 疏曰以此三教教國子王太子已下至元士之適子也 朱子曰至德云者誠意正心端本清源之事道則天人

性命之理事物當然之則脩身齊家治國平天下之術也敏德云者彊志力行蓄德廣業之事行則理之所當為日可見之跡也孝德云者尊祖愛親不忘其所由生之事知逆惡則以得於己者篤實深固有以真知彼之逆惡而自不忍為者也 呂伯恭曰賢良

者國中之先生長者也師長者朝夕與吾處者也

黃文叔曰六德三德同此德也六德舉其成德之可名者也三德原始要終使知所由入也六行三行同

此行也孝弟而已矣 行下孟反知音智

居虎門之左司王朝

註曰虎門路寢門也王日視朝於路寢門外畫虎焉
以明勇猛於守宜也司猶察也察王之視朝若有善
道可行者則當前以詔王

○掌國中失之事以教國子弟

註曰教之者使識舊事也中中禮者也失失禮者也
故書中為得杜子春云當為得記君得失若春秋是

也 陳君舉曰教以德行以立其根本又須教以國政使之通達治體

○凡國之貴遊子弟學焉

註曰貴遊子弟王公之子弟遊無官司者 疏曰即上之國子弟也 李景齊曰國之貴遊子弟皆宿衛者也以其在王宮而於王為近且密師氏以媿詔王則王聞正言知正道固可以格其非心然退而寒之者衆則此心易搖故必教國子以善使之在王所者

長幼卑尊無非端士王誰與為不善乎 朝直遙反

中丁仲反

凡祭祀賓客會同喪紀軍旅王舉則從

註曰舉猶行也 疏曰此數事王行之時師氏則從以王所在皆須詔王以美道故也

○聽治亦如之

註曰謂王舉於野外以聽朝 疏曰即上數事王所在皆有朝以聽治之故從王亦如上虎門之左同故

云亦如之 鄭景望曰王之出入起居無不與知隨
事而將順救正之則達善於萌止惡於微過易寡而
德易成

使其屬帥四夷之隸各以其兵服守王之門外且蹕
屬即上士府史胥徒之等兵服東方南方其服布其
兵劍西方北方其服旃其兵弓矢不同也門外中門
之外蹕止行人不得迫王宮也

○朝在野外則守內列

註曰內列蕃營之在內者也其屬亦率四夷之隸守之如守王宮 疏曰朝在野外即上文聽治是也

○保氏掌諫王惡

註曰諫者以禮義正之文王世子曰保也者慎其身以輔翼之而歸諸道者也

○而養國子以道乃教之六藝一曰五禮二曰六樂三曰五射四曰五馭五曰六書六曰九數乃教之六儀一曰祭祀之容二曰賓客之容三曰朝廷之容四曰喪紀

之容五曰軍旅之容六曰車馬之容

道即藝與儀也藝者道之寓使之得於手而應乎心
容者道之發使之根於心而生於色莫非養其道心
之方也 註曰五禮吉凶賓軍嘉也六樂雲門大咸
大韶大夏大濩大武也鄭司農云五射白矢參連剡
注襄尺井儀也五馭鳴和鸞逐水曲過君表舞交衢
逐禽左六書象形會意轉注處事假借諧聲也九數
方田粟米差分少廣商功均輸方程贏不足旁要今

有重差夕桀勾股也玄謂祭祀之容齊齊皇皇賓客
之容穆穆皇皇朝廷之容濟濟翔翔喪紀之容纍纍
顛顛軍旅之容暨暨詒詒車馬之容匪匪翼翼 剡
羊甚反襄音讓差初佳反重直龍反桀音的濟子禮
反暨其器反詒五格反

凡祭祀賓客會同喪紀軍旅王舉則從聽治亦如之使
其屬守王闈

註曰闈宮中之巷門 鄭剛中曰諫惡之官尤當自

宮闈始

○司諫掌糾萬民之德而勸之朋友正其行而強之道

藝

註曰朋友相切磋以善道也強猶勸也 朱子曰人

之大倫其別有五必欲君臣父子兄弟夫婦之間交
盡其道而無悖非有朋友以責善輔仁孰能使之然
哉此古之聖人脩道立教所以必重乎此而不敢忽
也行下孟反強其丈反

巡問而觀察之以時書其德行道藝辨其能而可任於國事者

註曰巡問行問民間也可任於國事任吏職 鄭剛
中曰巡而問之觀而察之見其德行道藝可書者則
以時書之其或才能過人穎脫於倫輩之中他日可
任國家之事者又別白而條具之 吳氏曰書而辨
之以待賓興

以攷鄉里之治以詔廢置以行赦宥

註曰因巡問強勸萬民而攷鄉里吏民臯過以告王
所當臯否

○司救掌萬民之衰惡過失而誅讓之以禮防禁而救
之

註曰衰惡謂侮慢長老語言無忌而未麗於臯者過
失亦由衰惡酗釁好訟若抽拔兵器誤以行傷害人
麗於臯者誅誅責也古者重刑且責怒之未即臯也
疏曰此經與下二經皆總目也誅讓之者即下二

文三讓是也以禮防禁而救之者此衰惡過失皆去
冠飾役之囚之皆使困苦而令改惡從善是救之也

衰音邪 𠂔許御切 虛去聲 𠂔音詠

凡民之有衰惡者三讓而罰三罰而士加明刑恥諸嘉
石役諸司空

註曰罰謂撻擊之也加明刑者去其冠飾而書其衰
惡之狀著之背也嘉石朝士所掌在外朝之門左使
坐焉以恥辱之既而役諸司空使事官作之也坐役

卷九
之數存於司寇 著直畧反

其有過失者三讓而罰三罰而歸於園土

註曰園土獄城也過失近臯晝日任之以事而收之夜藏於獄亦加明刑以恥之不使坐嘉石其臯已著未忍刑之

凡歲時有天患民病則以節巡國中及郊野而以王命施惠

註曰天患謂灾害也節旌節也施惠賙恤之

○調人掌司萬民之難而諧和之

註曰難相與為仇讎諧猶調也

○凡過而殺傷人者以民成之

註曰過無本意也成平也鄭司農云以民成之以鄉里之民共和解之

○鳥獸亦如之

註曰過失殺傷人之畜產者 王氏曰鳥獸謂畜產
猛鷲殺傷人也

凡和難父之讎辟諸海外兄弟之讎辟諸千里之外從父兄弟之讎不同國君之讎祇父師長之讎祇兄弟主友之讎祇從父兄弟

註曰和之使辟於此不得就而仇之九夷八蠻五戎六狄謂之四海主大夫君也疏曰此經畧言其不言者皆以服約之伯叔父母姑姊妹女子子在室及兄弟子衆子一與兄弟同其祖父母曾祖父母高祖父母其孫承後皆斬衰皆與父同其不承後者祖與

伯叔同曾祖高祖齊衰三月皆與從父兄弟同以其
同繩屨故也自外不見者據服為斷也其兄弟及從
父兄弟師長主友皆謂無子復無親於己者故據已
親疎為遠近若有子及親於己則自從親為斷復讎
之灋可盡五世之內五世之外施之於己則無義施
之於彼則無辜所復者唯謂殺者之身乃在被殺者
子孫可盡五世得復之 坡謂此經為過而殺傷人
者立法虞書曰宥過無大康誥曰大辜非終乃不可

殺正謂此也故過而殺傷人者律之以王灋則無死
本之以忠臣孝子之心則無生惟辟而去焉因其可
生而生之非惜一人之命而縱逆惡非墮王章以弛
忠孝之倫也讎者已遠則臣子之憾亦可少泐已所
以酌情理之中而為是權灋耳君師主友乃因父兄
之讎比類及之不通上文和難為義蓋君無過而殺
傷之事也嗚呼無闕睢麟趾之意而欲行斯灋也吾
恐故殺者布財於官吏將託為過殺而出之矣是啓

之也又在善用之者

○弗辟則與之瑞節而以執之

註曰瑞節玉節之刺圭也和之而不肯辟者是不從王命也王以刺圭使調人執之治其鼻 辟音避下同從才用反

凡殺人有反殺者使邦國交讎之

註曰反復也復殺之者此欲除害弱敵也邦國交讎之明不和諸侯得者即誅之鄭司農云有反殺者謂

重殺也

凡殺人而義者不同國令勿讎讎之則死

兩下相殺曰殺義宜也此乃為寇攘誘臣妾之小人
身其害而殺之者為得其宜雖所殺者人之父兄不
得讎也使之不同國而已如今時王灋殺姦盜於室
中律置不問其此類與

凡有鬪怒者成之不可成者則書之先動者誅之

註曰鬪怒辨訟者也不可成不可平也書之記其姓

名辨本也鄭司農云成之謂和之也和之猶今二千石以令解仇怨後復相報移徙之此其類也

○媒氏掌萬民之判

註曰判半也得耦為合主合其半成夫婦也喪服傳曰夫妻判合鄭司農云主萬民之判合

○凡男女自成名以上皆書年月日名焉

註曰鄭司農云成名謂子生三月父名之

○令男三十而娶女二十而嫁

註曰二者天地相承覆之數也易曰參天兩地而
奇數焉疏曰王肅曰家語哀公問於孔子男子十
六精通女子十四而化是則可以生民矣聞禮男三
十而有室女二十而有夫豈不晚哉孔子曰夫禮言
其極亦不是過男子二十而冠有為人父之端女子
十五許嫁有適人之道於此以往則自婚矣然則三
十之男二十之女中春之月者所謂言其極灋耳
奇音倚中音仲

凡娶判妻入子者皆書之

鄭剛中曰判之為言謂夫妻反目分別而去也入子者已無嗣子或入同宗之子以為嗣如今世之立嗣坡謂娶判妻書之防姦私也入子書之恐收養異姓則他日之婚姻無別也

中春之月令會男女

註曰中春陰陽交以成昏禮順天時也

○於是時也奔者不禁

坡謂六禮備為漸易曰漸女歸吉是也六禮不備為
奔奔者迅疾之意不以漸也古者夫婦有別而後父
子有親一禮不備不可以行今之奔者不禁何容有
三十之男二十之女可以判合而未合者雖不備禮
猶許之非慕說相奔就之說也

○若無故而不用令者罰之

故謂凶荒札喪也今以時以禮之令也有喪荒者娶
不備禮不用中春大司徒荒政十曰多昏雜記曰已

雖小功既卒哭可以冠子娶妻 中音仲慕說之說

音悅

司男女之無夫家者而會之

坡謂司猶察也無夫家謂未有夫家也男無家者或單或貧而不能娶女無夫者或屈於孤賤過期而不行且時有天患民病男女仳離如此之類皆司而會之也若夫鰥寡聖人亦各從其志耳豈有抑其貞操強使判合乎嗚呼餓死事極小失節事極大曾謂周

公而不見此與 會古外反化普弭反強上聲

凡嫁子娶妻入幣純帛無過五兩

註曰純實緇字也古緇以才為聲納幣用緇婦人陰也凡於娶禮必用其類五兩十端也必言兩者欲得其配合之名十者用五行十日相成也士大夫乃以玄纁束帛天子加以穀圭諸侯加以大璋雜記曰納幣一束束五兩兩五尋然則每端二丈 疏曰凡嫁子娶妻含尊卑但曰緇帛文主庶人耳若餘行禮則

用制幣丈八尺取儉易共此昏禮取誠實之義故以
二丈整數為之也 純音緇

禁遷葬者與嫁殤者

註曰遷葬謂生時非夫婦死既葬遷之使相從也殤
十九以下未嫁而死者生不以禮相接死而合之是
亦亂人倫者也

凡男女之陰訟聽之於勝國之社其附於刑者歸之于
士

註曰陰訟爭中葦之事以觸瀟者勝國亡國也亡國之社奄其上而棧其下使無所通就之以聽陰訟之情明不當宣露其臯不在赦宥者直歸士而刑之不復以聽士司寇之屬詩云牆有茨不可掃也中葦之言不可道也所可道也言之醜也 葦古候反棧才產反

司市掌市之治教政刑量度禁令

註曰量豆區斗斛之屬度丈尺也

劉原父曰治謂

正萬民交易之法教謂使三市信義不欺政謂平百物輕重之價刑謂制盜賊姦偽之民量平穀米度定布帛禁謂壞法亂俗之物不償於市令謂宣教立政之事必憲於民 償音育後同憲音懸

以次叙分地而經市

註曰次謂吏所治舍思次介次也若今市亭然叙肆行列也經界也

○以陳肆辨物而平市

陳猶次也辨物物異肆也美惡不混其價自顯而平
即天官內宰所云正其肆陳其貨賄之事也

○以政令禁物靡而均市

註曰物靡者易售而無用禁之則市均鄭司農云靡
謂侈靡也 疏曰物靡買之者多貴而無用令使用
物買之者少而賤則市賈不均故禁之

○以商賈阜貨而行布

註曰通物曰商居賣物曰賈阜猶盛也鄭司農云布

謂泉也 王光遠曰布者所以權百物而通之貨苟

不阜則布無所通故必以商賈阜貨而行之

○以量度成賈而徵儻

註曰徵召也儻買也物有定價則買者來也

○以質劑結信而止訟

註曰質劑謂兩書一札而別之也若今下手書言保
物要還矣

○以賈民禁偽而除詐

註曰賈民胥師賈師之屬必以賈民為之者知物之情偽與實詐 疏曰偽據物而言詐據人而說也

○以刑罰禁毆而去盜

註曰刑罰憲徇扑

○以泉府同貨而斂賒

註曰同共也同者謂民貨不售則為斂而買之民無貨則賒貰而予之 坡謂次叙陳肆先定其規畫也 而後興利故政令商賈次之利聚而後賣者買者資

焉故次之以量度質劑則市事盡矣賈民刑罰去市之害泉府通市之窮故又次於後 商賈賈民註曰賈賈師同音古成賈註市賈同音嫁行戶剛反下同 賈音世

大市日昃而市百族為主朝市朝時而市商賈為主夕市夕時而市販夫販婦為主

註曰日昃昃中也市雜聚之處言主者謂其多者也百族必容來去商賈家於市城販夫販婦朝資夕賣

因其便而分為三時之市所以了物極衆鄭司農云
百族百姓也 疏曰案匠人市朝一夫各方百步就
百步而分為三時之市恐不可若然則一夫者據市
亭置次司市及賈師胥師聽事之處取其列行肆之
處則居地多矣此三市皆於一院內為之大市於中
朝市於東偏夕市於西偏郊特牲所云是也

○凡市入則胥執鞭度守門市之羣吏平肆展成奠賈
上旌於思次以令市市師泣焉而聽大治大訟胥師賈

師泣於介次而聽小治小訟

凡市入謂三時之市市者入也胥守門也察詐偽也
必執鞭度以威正人衆也繫鞘於上則為鞭因刻丈
尺則為度羣吏胥師以下也平肆平賣物之行列使
之正也展整也成平也所以成平市物者即今之牙
僧也奠讀為定整勅會者使定物賈防誑豫也上旌
者以為衆望也見旌則知當市也思次若今市亭也
市師司市也介次市亭之屬別小者也泣視也思當

為司字聲之誤也

○凡萬民之期于市者辟布者量度者刑戮者各於其地之叙

期謂欲買賣期決於市也辟灋也灋布者鑄泉之處也量度者成賈之處也刑戮者決臯之處也各赴於其叙則事雖繁而人不雜矣

○凡得貨賄六畜者亦如之三日而舉之

註曰得遺物者亦使置其地貨於貨之肆馬於馬之

肆則主求之易也三日而無識認者舉之沒入官
坡謂自大市至此唯次叙分地而經市乃可如此
廼同奠音定奠賈之賈音嫁辟音壁映音經鞘所
交反僧古外反易以豉反

凡治市之貨賄六畜珍異亡者使有利者使阜害者使
亡靡者使微

註曰利利於民謂物實厚者害害於民謂物行苦者
使有使阜起其賈以徵之也使亡使微抑其賈以卻

之也侈靡細好使富民好奢微之而已鄭司農云亡者使有亡此物則開利其道使之有坡謂此一節乃以政令禁物靡而均市也亡音無下同賈音嫁好奢之好呼報反

凡通貨賄以璽節出入之

註曰璽節印章如今斗檢封矣使人執之以通商以出貨賄者王之司市也以內貨賄者邦國之司市也○國凶荒札喪則市無征而作布

註曰有災害物貴市不稅為民乏困也金銅無凶年
因物貴大鑄泉以饒民 陳及之曰市既無征則物
聚多物多則錢重錢重則物反輕非所以便商旅也
作布則物雖多而錢不重商賈獲其利則來者多矣
坡謂自凡通貨賄至此乃以商賈阜貨而行布也
內音納

凡市偽飾之禁在民者十有二在商者十有二在賈者
十有二在工者十有二

註曰鄭司農云所以俱十有二者工不得作賈不得
粥商不得資民不得畜玄謂王制曰用器不中度不
粥於市兵車不中度不粥於市布帛精絜不中數幅
廣狹不中量不粥於市姦色亂正色不粥於市五穀
不時果實未熟不粥於市木不中伐不粥於市禽獸
魚鼈不中殺不粥於市亦其類也於四十八則未聞
數十二焉 坡謂此一節乃禁偽而除詐也 賈音
古粥音鬻下同中丁仲反

市刑小刑憲罰中刑徇罰大刑扑罰其附于刑者歸于士

註曰徇舉以示其地之衆也扑撻也鄭司農云憲罰播其肆也疏曰徇既將身以示之則憲是以文書表示於肆

○國君過市則刑人赦夫人過市罰一幕世子過市罰一帑命夫過市罰一蓋命婦過市罰一帷

註曰謂諸侯及夫人世子過其國之市大夫內子過

其都之市也市者人之所交利而行刑之處君子無故不遊觀焉若遊觀則施惠以為說也國君則赦其刑人夫人世子命夫命婦則使之出罰異尊卑也所罰謂憲徇扑也必罰幕帟蓋帷市者衆也此四物者在衆之用也此王國之市而說國君以下適市者諸侯之於其國與王同以其足以互明之疏曰憲徇刑之輕者而赦之使出帷幕難備之物者出物雖重而無恥憲徇雖輕而有愧故以出物為輕也王介

甫曰市人犯刑以利而已國君近利則市人何誅焉
故赦之罰之 坡謂自市刑至此乃以刑罰禁飭而
去盜也至量度質劑司在質人陳肆辨物職之肆長同
貨斂賒專自泉府各於當官詳之 帝音繹說如字
解說也

凡會同師役市師帥賈師而從治其市政掌其賣債之
事

註曰市司司市也債買也會同師役必有市者大衆

所在來物以備之

○質人掌成市之貨賄人民牛馬兵器珍異

註曰成平也會者平物價而來主成其平也人民奴婢也珍異四時食物

凡賣債者質劑焉大市以質小市以劑掌稽市之書契
註曰質劑者為之券藏之也大市人民牛馬之屬用
長券小市兵器珍異之物用短券稽猶考也治也書
契取予市物之券也其券之象書兩札刻其側 坡

謂此節所謂以質劑結信而止訟也質劑與書契有別質劑者民既貿易各有執信若今之買牛契之類也書契者取予之券若今之借字限字也書契或有虛名詭書或取者有契而不還其貸或予者已收責而靳其契亦皆不信而可致訟者故又掌稽之音與

同其度量壹其淳制巡而攷之犯禁者舉而罰之

註曰杜子春云淳當為純純謂幅廣制謂匹長也皆

當中度量玄謂淳讀如淳尸盥之淳 坡謂此節所

謂以量度成賈而徵償也同之壹之則無長短多少

之差而賈自定矣 中丁仲反賈音嫁

凡治質劑者國中一旬郊二旬野三旬都三月邦國朞
期內聽期外不聽

註曰謂齋券契者來訟也以期內來則治之後期則
不治所以絕民之好訟且息文書也郊遠郊也野旬
稍也都大都小都 疏曰此經總上質劑與書契來

訴者 齋音貴

○廛人掌斂布帛布總布質布罰布廛布而入於泉府

註曰布泉也鄭司農云帛布列肆之稅布杜子春云

總當為僂謂無肆立持者之稅也質布者質人之所

罰犯質劑者之泉也罰布者犯市令者之泉也廛布

者貨賄諸物邸舍之稅 帛音次總讀僂音纓

凡屠者斂其皮角筋骨入於王府

註曰以當稅給作器物也 疏曰屠者其人亦有地

稅因其屠即取皮角筋骨堪飾器物者使入王府以當邦賦

凡珍異之有滯者斂而入於膳府

註曰故書滯或作塵玄謂滯讀如沈滯之滯珍異四時食物也不售而在塵久則瘦癯腐敗為買之入膳夫之府所以紓民事而官不失實 癯其俱反

○胥師各掌其次之政令而平其貨賄憲刑禁焉察其詐偽飾行僨慝者而誅罰之

刑憲徇扑也禁偽飾之禁也 坡謂行不堅固也唐

韓琬傳云器不行窳飾行巧飾其行也儻賣也慝惡也

聽其小治小訟而斷之

憲刑之憲音懸行下孟反

○賈師各掌其次之貨賄之治辨其物而均平之展其成而奠其賈然後令市

鄭剛中曰在肆之物美惡混淆故使之辨 賈師之

賈音古下同眞音定其賈之賈音嫁

凡天患禁貴儻者使有恒賈

註曰恒常也謂若睹米穀棺木而睹久雨疫病者貴
賣之因天災害阨民使之重困 史直翁曰物價翔
踴不可禁禁之則深藏而不出求者多則賈不得不
貴雖有知巧何以弭之先王之市已先知其貨賄多
寡有無之所在故能使其必儻而市價可使不貳故
曰使有常價後世無灋以處徒肆其刑威以禁之欲

求其賈之有常不可得已

○四時之珍異亦如之

註曰薦宗廟之物 疏曰此珍異亦是富人賤時豫
儲而後貴時賣之 賈音嫁註同儲貯同重直龍反
凡國之賣債各帥其屬而嗣掌其月

註曰債買也故書賣為買鄭司農云謂官有所斥令
賣賈師帥其屬而更相代直月為官賣之均勞逸

○凡師役會同亦如之

疏曰此亦從行所在當直為官買賣也

○司隸掌憲市之禁令禁其鬪鬻者與其越亂者出入相陵犯者以屬遊飲食于市者

註曰鬪謹也 徐氏曰鬪者以力爭鬪者以口競鬪者虐物亂者恃理出入陵犯謂恃強以相陵屬遊飲食謂羣飲而敗禮

○若不可禁則搏而戮之

邱氏曰搏伺而禽之 史直翁曰先王有心於愛民

故設吏以禁黷後世有心於取利故設吏以為黷民
有一物吏思得之既不可以自取必借姦民以為囊
橐民或不從則鬪鬪黷亂陵犯無所不至民不得已
而予之吏既受矣姦民於是愈肆吏方拱手聽命而
敢搏而戮之乎是以欲行禁黷當先擇吏之良者以
處於上而下之姦民自化矣 鬪五羔反搏音博同
捕予音與

○司稽掌巡市而察其犯禁者與其不物者而搏之

註曰不物衣服視占不與衆同及所操物不如品式
掌執市之盜賊以徇且刑之

疏曰市之盜賊亦無過小盜徇扑而已

○胥各掌其所治之政執鞭度而巡其前掌其坐作出
入之禁令襲其不正者

註曰作起也坐起禁令當市而不得空守之屬杜子
春云襲謂掩捕其不正者

○凡有罪者撻戮而罰之

註曰罰之使出布

○肆長各掌其肆之政令陳其貨賄名相近者相遠也實相近者相爾也而平正之

註曰爾亦近也俱是物也使惡者遠善善自相近鄭司農云謂若珠玉之屬俱名為珠俱名為玉而賈或百萬或數萬恐農夫愚民見欺故別異令相遠使賈人不得雜亂以欺人坡謂此官所謂以陳肆辨物而平市也

○斂其總布掌其戒禁

註曰杜子春云總當為僂 遠於萬反註同而賈音

嫁賈人音古

○泉府掌以市之征布斂市之不售貨之滯於民用者以其賈買之物楬而書之以待不時而買者買者各從其抵都鄙從其主國人郊人從其有司然後予之

註曰鄭司農云物楬而書之物物為楬書書其賈楬著其物也不時買者謂急求者也主者別治大夫也

玄謂抵實祗字祗本也本謂所屬吏主有司是也

疏曰征布者即上廛人紵布已下之布並入泉府而
藏之故總云征布也 賈音嫁予音與榆音賤

凡賒者祭祀無過旬日喪紀無過三月

註曰鄭司農云賒貫也以祭祀喪紀故從官貫買物
凡民之貸者與其有司辨而授之以國服為之息

註曰有司其所屬吏也與之別其貸民之物定其賈
以予之 疏曰此經不言都鄙主者有司中兼之

坡謂國服為息儒者因青苗之害改為說者不一抑
無庸也其時孫覺奏曰成周賒貫特以備民之緩急
不可徒與也故與國服為之息然國服之息說者不
明鄭氏釋經乃引王莽為據不應周公取息重於莽
時况國用專取具於泉府則冢宰九賦將安用取聖
世宜講求先王之灋不當取疑文虛說以圖治安善
哉言也古今異宜微文難知後聖有作或在損益此
語似可闕疑 賈音嫁予音與

凡國事之財用取具焉歲終則會其出入而納其餘

註曰會計也納入也入餘於職幣坡謂邦之大用

內府待之小用外府待之則此國事之財用者專指王之膳服也會古外反

陳君舉曰王荊公嘗謂周禮一書理財居其半自有周禮以來劉歆輔王莽專為理財至荊公熙寧亦專理財所以先儒多疑於周禮今細攷之亦誠有可疑者且以廩人一官論之所謂歛布者鄭氏

謂列肆之稅即今之房廊錢所謂廛布者鄭氏謂諸物邸舍之稅即今之白地錢又有罰布者賣買不平之罰質布者質人巡攷犯禁之罰即今之搭地錢又有總布者子春謂無肆立持之稅若熙寧間不係行錢人凡屠者斂皮角筋骨入於王府即今所謂納筋骨者斂珍異之滯者入於膳府則以供一人之玩好者德宗宮市之弊其初只教官與百姓交易後乃用宦者為使買之多不償其本錢

熙寧不係行錢鄭俠奏議謂負水拾髮擔粥提茶
皆有免行然則廛人之弊安得不至於此其他自
山虞以至澤虞自汴人以至掌炭又有上項征稅
如此其未至市肆者在川則有川禁澤則有澤禁
金玉鈇錫則有禁齒草羽毛則有禁絺綌薪炭則
有禁所以取民者無一不備與夫司門犯禁之財
司關舉貨之罰巾車之車折則入齋馮質之馬死
則物更先王所以不與民爭利者全不見於此書

所以王莽用周禮遂有五均六幹列肆里區無不
征之荆公用周禮遂有坊場河渡白地房廊搭罰
六色免行市例之類無所不有至使周禮之書後
人不得嘗試夫周禮之灋果如是耶抑用之者失
其意耶
坡謂此論詳贍明快然劉王果能使其
君自冢宰頭一段漸次行到司市即無此患

音礦鉦鉛同

周禮述註卷九

欽定四庫全書

經部

周禮述註卷廿一

詳校官監察御史_臣施朝幹

刑部郎中_臣許兆椿覆勘

總校官進士_臣朱鈐

校對官員外郎_臣張慎和

謄錄監生_臣王家賓

欽定四庫全書

周禮述註卷十

安溪李光坡撰

○司門掌授管鍵以啓閉國門

管籥鍵壯也入者為壯容者為北管以閉而鍵以啓

鍵其展反

幾出入不物者正其貨賄凡財物犯禁者舉之

註曰不物衣服視占不與衆同及所操物不如品式

者正讀為征征稅也犯禁謂商所不資者舉之沒入
官 陳及之曰犯禁即司市偽飾之灋在民商賈工
者十有二是也 正音征賈音古
以其財養死政之老與其孤

註曰財謂門閭之委積也死政之老死國事者之父
母也孤其子

祭祀之牛牲繫焉監門養之

散祭祀之牲則不在牢繫于門使監門養之不必三

月也監門門徒

○凡歲時之門受其餘

註曰鄭司農云受祭門之餘 疏曰歲之四時祭門
非一故云凡以總之若月令秋祭門者是祭廟門此
門亦謂國門十二者除四時祭外仍有為水祈禱故
莊公二十五年秋大水有用牲于門之事 監古銜

反

凡四方之賓客造焉則以告

註曰造猶至也告告於王而止客以侯逆 疏曰謂
四方諸侯來朝覲至闕闕人告王至郊郊人告王至
國門門人告王王得告皆遣人往迎

○司關掌國貨之節以聯門市

註曰貨節謂商本所發司市之璽節也自外來者則
案其節而書其貨之多少通之國門國門通之司市
自內出者司市為之璽節通之國門國門通之闕門
參相連以檢猾商 猾音滑

司貨賄之出入者掌其治禁與其征廛

註曰征廛者貨賄之稅與所止邸舍也關下亦有邸舍其出布如市之廛 疏曰司貨賄出入即上經以聯門市者也

○凡貨不出於關者舉其貨罰其人

註曰不出於關謂從私道出辟稅者則沒其財而撻其人 辟音避

凡所達貨賄者則以節傳出之

註曰商或取貨於民間無璽節者至關闕為之璽節
及傳出之其有璽節亦為之傳傳如今移過所文書
疏曰此文重釋上文國貨之節上直云璽節此經
兼有傳

國凶札則無關門之征猶幾

註曰鄭司農云凶謂凶年饑荒也札謂疾疫死亡也
越人謂死為札春秋傳曰札瘥天昏無關門之征者
出入關門無租稅猶幾謂無租稅猶苛察不得令姦

人出入 疏曰此司關所掌兼言門者門關同類無
征是同司門既不言故於關并言門也 瘡才何反
凡四方之賓客敎關則為之告

註曰謂朝聘者也敎關猶謁關人也敎猶至也鄭司
農說以國語曰周之秩官有之曰敎國賓至關尹以
告行理以節逆之 敎音叩

有外內之送令則以節傳出內之

有送令謂奉貢獻及文書以常事往來自王國來者

以節傳出之自畿外入者以節傳內之 出內傳內

俱音納

○掌節掌守邦節而辨其用以輔王命

註曰王有命則別其節之用以授使者輔王命者執以行為信 王龜齡曰邦節者下文所謂玉節角節用之於內外諸侯虎節龍節人節用之於邦國使者符節璽節用之於司門司關司市及鄉遂之間總而言之皆邦節也鄭以典瑞之珍圭牙璋等為邦節未

知是否 別彼列反使所吏反下同

守邦國者用玉節守都鄙者用角節

註曰玉節之制以命數為小大角用犀角其制未聞
鄭剛中曰命為諸侯使守邦國者用玉節以輔之
命為君長使守都鄙者用角節以輔之

凡邦國之使節山國用虎節土國用人節澤國用龍節
皆金也以英蕩輔之

註曰使節行道所執之信也土平地也山多虎平地

多人澤多龍以金為節鑄象馬必自以其國所多者
於以相別為信明也今漢有銅虎符杜子春云蕩當
為帑謂以函器盛此節或曰英蕩畫函 鄭剛中曰
前言玉節角節則王命之守此言虎節人節龍節則
王使者執行以為信 王光遠曰掌節所掌謂之邦
節以輔王命所謂邦國之使節使邦國者所執也小
行人所達謂之天下之節則邦國都鄙使者所執非
王官所掌 坡謂雖非王官所掌其灋式亦必自掌

節出 帑吐黨反盛音成

門闕用符節貨賄用璽節道路用旌節皆有期以反節
註曰門闕司門司闕也貨賄者主通貨賄之官謂司
市也道路主治五涂之官謂鄉遂大夫也凡民遠出
至於邦國邦國之民若入來由門者司門為之節由
闕者司闕為之節其商則司市為之節其以徵令及
家徙則鄉遂大夫為之節唯時事而行不出闕不用
節也變司市言貨賄者璽節主以通貨賄貨賄非必

由市或資於民家焉變鄉遂言道路者容公邑及小都大都之吏皆主治五涂亦有民也符節者如今宮中諸官詔符也璽節者今之印章也旌節今使者所擁節是也將送者執此節以送行者皆以道里日時課如今郵行有程矣以防容姦擅有所通也凡節有灋式藏於掌節黃文叔曰節皆邦節有守節有行節玉節邦國守之角節都鄙守之是謂守節使節及門闕道路之節皆行節也必自掌節出付使隨事用

之註言關市道路之官皆得為節如此則雜主掌節何以設專職哉 涂音途

凡通達於天下者必有節以傳輔之

註曰必有節言遠行無有不得節而出者也輔之以傳者節為信耳傳說所齎操及所適 疏曰此經總解上經門關諸有節并有傳輔成信驗或有節無傳或有傳無節或節傳俱無則不得通達於天下也

○無節者有幾則不達

註曰園土內之

疏曰此亦總解上文門闕已下應

有節傳今無節者非直被幾又不通達前所也 齋

音賁內音納

○遂人掌邦之野

註曰郊外曰野此野為甸稍縣都 疏曰不言掌遂

又下文云以達于畿明遂人掌野通至畿疆也

以土地之圖經田野造縣鄙形體之灋五家為鄰五鄰為里四里為鄣五鄣為鄙五鄙為縣五縣為遂皆有地

域溝樹之使各掌其政令刑禁以歲時稽其人民而授之田野簡其兵器教之稼穡

註曰經形體皆為制分界也鄰里鄴鄙縣遂猶郊內比閭族黨州鄉也鄭司農云田野之居其比伍之名與國中異制故五家為鄰立謂異其名者示相變耳遂之軍灋追胥起徒役如六鄉疏曰以土地之圖經田野所經者即造縣鄙以下是也造縣鄙者此與下五家為鄰之等為總目五家以下有六等畧言二

者耳使各掌其政令刑禁者五家則鄰長施政令五鄰則里宰施政令已上皆施之其以歲時以下亦使各掌者以之 鄴作管反長丁丈反

凡治野以下劑致甿以田里安甿以樂昏擾甿以土宜教甿稼穡以興勸利甿以時器勸甿以疆予任甿以土均平政

上節言經理其居人民之灋此則詳安集其人民之道也變民言甿異外内也甿猶懵懵無知貌也致猶

會也民雖受上田中田下田及會之以下劑為準謂
可任者家二人田謂百畝之田里謂五畝之宅安
者民得業則安樂昏勸其昏姻如媒氏會男女也擾
順也高田種黍稷下田種稻麥是以土宜教稼穡也
杜子春讀耒為助謂起民人令相佐助是與民為利
也時器制作耒耜錢鎛之屬先時修之及時用之所
以勸功也疆予謂民有餘力復予之田若餘夫然政
讀為征土均掌均平其稅八者之序以下劑致民受

田多而征役少使其民皆說而願為之甿也然後田里以安之樂昏以擾之則民入有家室之依其心安焉土宜以教之興耒以利之則民出有作息之樂其業成焉又恐其廢時失事也復時器以勸之又恐其有曠土游民也復疆予以任之則征稅由此而出更以土均平之而民無不均之嘆矣 甿音萌耒音助後同予音與政音征懣音蒙猶會及會均古外反鑄音博

辨其野之土上地中地下地以頒田里上地夫一廛田百晦萊五十晦餘夫亦如之中地夫一廛田百晦萊百晦餘夫亦如之下地夫一廛田百晦萊二百晦餘夫亦如之

註曰萊謂休不耕者鄭司農云戶計一夫一婦而賦之田其一戶有數口者餘夫亦受此田也廛居也玄謂廛城邑之居孟子所云五畝之宅樹之以桑麻者也六遂之民餘夫竒受一廛雖上地猶有萊皆所以

饒遠也 坡謂此詳言分田里以安甿之制也其餘
七者則田里中事耳 奇居宜反

凡治野夫間有遂遂上有徑十夫有溝溝上有畛百夫
有洫洫上有涂千夫有澮澮上有道萬夫有川川上有
路以達于畿

註曰十夫二鄰之田百夫一鄰之田千夫二鄙之田
萬夫四縣之田遂溝洫澮皆所以通水于川也遂廣
深各二尺溝倍之洫倍溝澮廣二尋深二仞徑畛涂

道路皆所以通車徒於國都也徑容牛馬畛容大車
涂容乘車一軌道容二軌路容三軌都之野涂與環
涂同可也萬夫者方三十三里少半里九而方一同
以南畝圖之則遂從溝橫洫從澮橫九澮而川周其
外焉去山陵林麓川澤溝瀆城郭宮室涂巷三分之
制其餘如此以至于畿則中雖有都鄙遂人盡主其
地 疏曰九澮則於四畔為大川此川亦人造雖無
丈尺之數蓋亦倍澮耳 坡謂此承上文一夫受田

百畝而詳言田野形體之制也

以歲時登其夫家之衆寡及其六畜車輦辨其老幼廢疾與其施舍者以頒職作事以令貢賦以令師田以起政役

註曰登成也猶定也夫家猶言男女也施讀為弛職謂民九職也分其農牧虞衡之職使民為其事也載師職云以物地事授地職互言矣貢九貢也賦九賦也政役出土徒役坡謂自此以下承上文田有定

制民有常業而使之供貢賦給繇役之事 施音弛

舍音捨政音征繇音遙

若起野役則令各帥其所治之民而至以遂之大旗致之其不用命者誅之

註曰役謂師田若有功作也遂之大旗熊虎 疏曰

起野役若小司徒凡起徒役毋過家一人之類也令者謂令縣正已下

凡國祭祀共野牲令野職

註曰共野牲入於牧人以待事也野職薪炭之屬

疏曰令令委人斂之

凡賓客令脩野道而委積

註曰委積於廬宿市 疏曰令令遺人也

大喪帥六遂之役而致之掌其政令及葬帥而屬六綽

及窆陳役

註曰致役致於司徒給墓上事及窆也綽舉棺索也
葬舉棺者謂載與說時也用綽旁六執之者天子其

千人與陳役者主陳列之耳匠師帥監之鄉師以斧
泣焉大喪之正棺殯啓朝及引六鄉役之載及窆六
遂役之亦即遠相終始也鄭司農云窆謂下棺時遂
人主陳役也禮記謂之封春秋謂之塋皆塋下棺也
聲相似 屬音燭縛音弗窆去聲窆昌絹反說始
銳反封彼驗反塋補鄧反

凡事致野役而師田作野民帥而至掌其政治禁令
註曰此居職末總結之言也 王光遠曰言事而又

言師田則事乃力政之事 政音征

○遂師各掌其遂之政令戒禁

易彥祥曰政若頒職作事以起政役之類令若令野職野賦令野脩道之類戒與禁則輔此而已 註政

役音征

以時登其夫家之衆寡六畜車輦辨其施舍與其可任者經牧其田野辨其可食者周知其數而任之以徵財征作役事則聽其治訟

註曰施讀亦弛也經牧制田畧與井也可食謂今年
所當耕者也財征賦稅之事 疏曰周知其數而任
之以徵財征者謂周徧知其夫家六畜及田野之等
任之據人民之數徵財征據田野之數也作役事則
聽其治訟者役事中可兼軍役田獵功作之等皆聽
其治訟

巡其稼穡而移用其民以救其時事

註曰移用其民使轉相助救時急事也四時耕耨斂

艾芟地之宜晚早不同而有天期地澤風雨之急

凡國祭祀審其誓戒共其野牲

註曰審亦聽也 疏曰案冢宰大祭祀掌百官之誓戒大司寇涖誓百官并戒百族此官主審其戒戒遂之民故不同也 王光遠曰共野牲贊遂人也

入野職野賦于玉府

註曰民所入貨賄以當九職九賦中玉府之用者 疏曰自甸稍縣都之等以其在遠郊之外故皆以

野言之 中丁仲反

賓客則巡其道脩庀其委積

註曰巡其道脩行治道路也庀具也

大喪使帥其屬以幄帟先道野役及窆抱磨共丘籠及
蜃車之役

註曰使以幄帟先者大宰也其餘司徒也幄帟先所
以為窆窆之間先張神座也道野役帥以至墓也邱
籠之役窆復土也其器曰籠蜃車柩路也柩路載柳

四輪迫地而行有似於蜃因取名焉行至壙乃說復更載以龍輶蜃禮記或作搏或作輶役謂執縛者磨者適歷執縛者名也遂人主陳之而遂師以名行校之磨音歷說音脫輶勅倫反搏輶俱市專反

軍旅田獵平野民掌其禁令比敘其事而賞罰

註曰平謂正其行列部伍也疏曰比敘者校比次

敘其行伍而行賞罰

○遂大夫各掌其遂之政令以歲時稽其夫家之衆寡

六畜田野辨其可任者與其可施舍者以教稼穡以稽
功事掌其政令戒禁聽其治訟

註曰施讀亦為弛功事九職之事民所以為功業

疏曰此一經與遂師職意同但互見其義耳 王龜

齡曰遂師遂大夫言政令戒禁縣正至里宰則特言

政令而戒禁無與鄰長於政令又無與

○令為邑者歲終則會政致事

註曰不言其遂之吏而言為邑者容公邑及卿大夫

王子弟之采邑政令戒禁遂大夫亦施焉 會古外

反與音預

正歲簡稼器脩稼政

註曰簡猶閱也稼器耒耜鉉耜之屬稼政孟春之月
令所云皆脩封疆審端徑術善相邱陵阪險原隰土
地所宜五穀所殖以教道民必躬親之 術音遂相
息亮反道音導

三歲大比則帥其吏而興眚明其有功者屬其地治者

註曰興眊舉民賢者能者如六鄉之為也興猶舉也屬猶聚也又因舉吏治有功者而聚勅其餘以職事

屬音燭

凡為邑者以四達戒其功事而誅賞廢興之

註曰四達者治民之事大通者有四夫家衆寡也六畜車輦也稼穡耕耨也旗鼓兵革也

○縣正各掌其縣之政令徵比以頒田里以分職事掌其治訟趨其稼事而賞罰之

徵徵召也比案比頒田里者如夫一廛田百畝也分
職事者九職之功事也 李嘉會曰頒田里分職事
慮有不得其平於是掌其治訟趨其稼事必有勤惰
之分故有賞罰 趨音促

若將用野民師田行役移執事則帥而至治其政令

註曰移執事移用其民鄭司農云謂轉相佐助

○既役則稽功會事而誅賞

疏曰此經結上文功役之事 王氏曰縣正即鄉州

長州長有讀灋攷行此互備也無之則遂大夫興眚
將安稽 會古外反行下孟反

○鄙師各掌其鄙之政令祭祀

註曰祭祀祭崇也 鄭剛中曰掌其祭祀則祭祀之
時亦如黨正教其禮事明矣

凡作民則掌其戒令

註曰作民謂起徒役也

以時數其衆庶而察其媿惡而誅賞

註曰時四時也 易氏曰嫩謂成於三物者惡謂陷

於八刑者

○歲終則會其鄙之政而致事

○鄮長各掌其鄮之政令以時校登其夫家比其衆寡
以治其喪紀祭祀之事

註曰校猶數也 疏曰治其喪紀謂民之喪紀若鄉
師所云族共喪器之類治其祭祀者謂若族祭酺之
類若然縣當祭社與州同縣正鄙師鄮長皆不言所

祭神者六遂與六鄉互見其義也

若作其民而用之則以旗鼓兵革帥而至若歲時簡器與有司數之

註曰簡器簡稼器也兵器亦存焉有司遂大夫疏

曰作其民而用之者謂師田及巡守之等直言以旗鼓兵革不言車輦文不具守音狩

凡歲時之戒令皆聽之趨其耕耨稽其女功

歲時戒令出於遂人者也聽受而行之也女功絲枲

之事 疏曰鄴長彌親民故趨其耕耨并稽攷女功之事 趨音促

○里宰掌比其邑之衆寡與其六畜兵器治其政令

註曰邑猶里也

以歲時合耦于耜以治稼穡趨其耕耨行其秩敘以待有司之政令而徵斂其財賦

註曰攷工記曰耜廣五寸二耜為耦此言兩人相助耦而耕也杜子春云耜讀為助謂相佐助也玄謂鋤

者里宰治處也若今街彈之室於此合耦使相佐助
因放而為名季冬之月令命農師計耦耕事脩耒耜
具田器是其歲時合人耦則牛耦亦可知也 疏曰
六遂賦稅縣師徵之旅師斂之此財賦言待有司徵
斂者謂縣師旅師也周末兼有牛耦漢趙過始教民牛
耕今鄭云牛耦者或周末兼有牛耦至趙過乃絕人
耦專用牛 鄭剛中曰宮伯行其秩敘註云秩祿稟
敘才等此農民耳所謂秩敘者何也蓋力田之賞也

如漢世力田者賜爵一級二級之類 趨音促放音

倣

○鄰長掌相糾相受

註曰相糾相舉察 疏曰鄰長不命之士為之

○凡邑中之政相贊

註曰長短使相補助 疏曰謂一里之內有上政令

徵求則五鄰共相贊助

○徙于他邑則從而授之

註曰從猶隨也授猶付也

○旅師掌聚野之勑粟屋粟閭粟

野謂甸稍縣都也勑粟民相助作所出之粟卽九賦之稅粟也所貢九穀亦存焉屋粟民有田不耕所罰三夫之稅粟閭粟閭民無職事者所出一夫之征粟
閭音閑

而用之以質劑致民平頒其興積施其惠散其利而均其政令

註曰而讀為若聲之誤也若用之謂恤民之難阨委積於野如遺人於鄉里也以質劑致民案入稅者名會而貸之興積所興之積謂三者之粟也平頒之不得偏頗有多少縣官徵聚物曰興今云軍興是也是粟縣師徵之旅師斂之而用之以調衣食曰惠以作事業曰利坡謂簿書若市券有長短故云質劑也均其政令者視難阨之甚否均施散之厚薄也

○凡用粟春頒而秋斂之

註曰困時施之饒時收之 坡謂上節言施惠散利
此則言其發斂之時也 積子賜反

凡新甿之治皆聽之使無征役以地之媿惡為之等

註曰新甿新徙來者也治謂有所求乞也使無征役
復之也王制曰自諸侯來徙家期不從政 坡謂征
役力役之征也以地媿惡為之等者坡從子倫云無
征役暫耳以地之媿惡為之等不易之地一年後征
役之一易者二年再易者三年

或問徵斂賦貢條目之詳曰司徒載師徵畿內之
九賦閭師徵六鄉之九功縣師所徵野賦貳載師
也其徵野貢以閭師不掌及也外此有遂師聚別
功賦貨賄中玉府用者委人斂旬稍芻薪徵稅之
官盡於是矣其斂之也賦功之物穀入于倉人金
玉玩好凡民貨賄入于玉府貨賄入于內府邦布
入於外府畜獸入于牧人牛人絲枲入于典絲典
枲是斂之也若乃遺人之委積旅師之賦粟則註

所云廩人倉人計九穀之數足國用以其餘共之
所謂餘瀫用也遺人註王氏所論會同軍旅委積
一節最為得之可以類推其餘

○稍人掌令丘乘之政令

註曰邱乘四邱為甸甸讀與維禹敷之之敷同其訓
曰乘由是改云是掌令都鄙脩治井邑邱甸縣都之
溝涂云邱甸者舉中言之溝涂之人名井別邑異則
民之家數存焉 敷音陣

金史卷之八
卷十
若有會同師田行役之事則以縣師之灋作其同徒輦輦帥而以至治其政令以聽於司馬

註曰有軍旅會同田役之戒縣師受灋於司馬邦國都鄙稍甸郊里唯司馬所調以其灋作其衆庶及馬牛車輦會其車人之卒伍使皆備旗鼓兵器以帥而至是以書令之耳其所調若在家邑小都大都則稍人用縣師所受司馬之灋作之帥之以致於司馬也同徒司馬所調之同凡用役者不必一時皆徧以人

數調之使勞逸遞焉 輦居錄反遞徒禮反

大喪帥蜃車與其役以至掌其政令以聽於司徒

註曰蜃車及役遂人共之稍人者野監是以帥而致之既夕禮曰既正柩賓出遂匠納車于階間則天子以至于士柩路皆從遂來

○委人掌斂野之賦斂薪芻凡疏材木材凡畜聚之物註曰野謂遠郊以外也所斂野之賦謂野之園圃山澤之賦也凡疎材草木有實者也凡畜聚之物瓜瓠

葵芋禦冬之具也野之農賦旅師斂之工商嬪婦遂師以入王府其牧則遂師又以共野牲芋于附反以稍聚待賓客以甸聚待羈旅

註曰聚凡畜聚之物也

○凡其聚以待頒賜

註曰余當為餘聲之誤也餘謂縣都畜聚之物疏

曰上已云稍甸此言餘聚是縣都中畜聚之物

以式灋共祭祀之薪蒸木材賓客共其芻薪喪紀共其

薪蒸木材軍旅共其委積薪芻凡疏材共野委兵器與其野圉財用

註曰式灋故事之多少也薪蒸給炊及燎麤者曰薪細者曰蒸木材給張事委積薪芻者委積之薪芻也軍旅又有疏材以助禾粟野委謂廬宿止之薪芻也其兵器謂守衛陳兵之器也野圉之財用者死圉藩籬之材

○凡軍旅之賓客館焉

註曰館舍也必舍此者就牛馬之用 疏曰言軍旅
賓客者謂諸侯以軍旅助王征討者故謂之軍旅之
賓客也

○土均掌平土地之政以均地守以均地事以均地貢
註曰政讀為征所平之稅邦國都鄙也地守虞衡之
屬地事農圃之職地貢諸侯之九貢 疏曰案下文
云以和邦國都鄙故知此平者亦據邦國都鄙若六
鄉六遂及公邑征稅自均人平之 政音征

以和邦國都鄙之政令刑禁與其施舍禮俗喪紀祭祀
皆以地媿惡為輕重之灋而行之掌其禁令

註曰施讀亦為弛也禮俗邦國都鄙民之所行先王
舊禮也君子行禮不求變俗隨其土地厚薄為之制
豐省之節耳禮器曰禮也者合於天時設於地財順
於鬼神合於人心理於萬物 項平甫曰和之如何
以地媿惡為輕重之灋而行之政令之緩急刑禁之
寬猛施舍之宜否禮俗之沿革喪紀祭祀之豐約宜

者令之不宜者禁之使適於和而已

○草人掌土化之灋以物地相其宜而為之種

註曰土化之灋化之使美若汜勝之術也以物地占其形色為之種黃白宜以種禾之屬 疏曰土化之灋者即下經糞種是也 相息亮反汜音凡

凡糞種駢剛用牛亦緹用羊墳壤用廩渴澤用鹿鹹潟用狍勃壤用狐埴塶用豕疆藥用蕢輕輿用犬

糞種者燒獸骨為灰以漬其種而植之今南方田皆

然辭剛謂地色赤而土剛強也赤緹鰲色也墳壤潤
解者渴澤故水處也渴鹵也獬貉類似狸銳頭尖鼻
勃壤粉解者埴壚黏䟽者疆槩疆堅者蕢麻也輕輿
輕脆者 緹音抵渴其列反渴音昔獬音九埴音實
壚音盧疆強上聲槩音搯輿音栗鰲七絹反黏音粘
脆音毳

○稻人掌稼下地

註曰以水澤之地種穀也謂之稼者有似嫁女相生

○以瀦畜水以防止水以溝蕩水以遂均水以列舍水以
澮寫水以涉揚其芟作田

註曰鄭司農說瀦防以春秋傳曰町原防規偃瀦杜
子春讀蕩為和蕩謂以溝行水也玄謂偃瀦者畜流
水之陂也防瀦旁隄也遂田首受水小溝也列田之
畦畔也澮田尾去水大溝作猶治也開遂舍水於列
中因涉之揚去前年所芟之草而治田種稻 瀦音
諸列祿計反町徒頂反陂音披畦音奚畔音劣

凡稼澤夏以水殄草而芟夷之

註曰殄病也絕也鄭司農說芟夷以春秋傳曰芟夷
蘊崇之今時謂禾下麥為萑下麥言芟刈其禾於下
種麥也玄謂將以澤地為稼者必於夏六月之時大
雨時行以水病絕草之後生者至秋水涸芟之明年
乃稼

○澤草所生種之芒種

註曰鄭司農云澤草之所生其地可種芒種疏曰

水鍾曰澤有水及鹹鹵皆不生草即不得芒種故云
草所生 易彥祥曰芒種稻之有芒者 芒種之種
章勇反

早暵共其雩斂

註曰稻人共雩斂稻急水者也鄭司農云雩事所發
斂 疏曰此旱雩據夏五月已後修雩者暵者旱之
熱氣若四月龍見而雩未必旱暵也然二種雩皆共
雩斂也

○喪紀共其葦事

註曰葦以閨壙禦濕之物 暎音漢閨音因

○土訓掌道地圖以詔地事

註曰道說也說地圖九州形勢山川所宜告王以施其事也若云荆揚地宜稻幽并地宜麻 疏曰其九州地圖乃是諸國所獻以入職方今土訓乃於職方取九州地圖依而說向王使依而責其貢獻之物

○道地慝以辨地物而原其生以詔地求

註曰地慝若瘴蠱然也辨其物者別其所有所無原其生生有時也以此二者告王之求也地所無及物未生則不求也鄭司農云地慝地所生惡物害人者若虺蜮之屬 虺虛鬼反蜮孚目反

王巡守則夾王車

註曰巡守行視所守也天子以四海為守 疏曰夾王車者亦在國掌道地圖以下之事

○誦訓掌道方志以詔觀事

註曰說四方所識久遠之事以告王觀博古所識若魯有大庭之庫釐之二陵

○掌道方慝以詔辟忌以知地俗

註曰方慝四方言語所惡也不辟其忌則其方以為苟於言語也知地俗博事也鄭司農云以詔辟忌不違其俗也疏曰誦訓掌道方慝以詔王辟忌所以然者使王博知地俗言語之事也辟音避識音志

王巡守則夾王車

註曰此亦與土訓同各以所掌以告王也 魏氏曰
古左圖右書土訓圖學誦訓書學

○山虞掌山林之政令物為之厲而為之守禁

註曰物為之厲每物有藩界也為之守禁為守者設
禁令也守者謂其地之民占伐林木者也鄭司農云
厲遮列守之 疏曰下文林自有衡官掌之今山虞
兼云林者彼林是竹木生平地者林衡掌之此山林
并云者自是山內之林即山虞兼掌之山內林木金

玉錫石禽獸所有不同每物各有藩界設禁亦不同
仲冬斬陽木仲夏斬陰木

註曰陽木生山南者陰木生山北者冬斬陽夏斬陰
堅濡調

○凡服耜斬季材以時入之

服謂牝服即車箱皆有鑿孔以軫子貫之故謂之牝
服季猶穉也服與耜宜用穉材尚柔忍也時入者以
其須堅故須依仲冬仲夏之時也 軫音陵

令萬民時斬材有期日

註曰時斬材斬材之時也有期日入出有日數為久
盡物 疏曰案王制云草木零落然後入山林彼據
萬民伐木之時謂十月之中此云萬民時斬材亦謂
十月時

○凡邦工入山林而掄材不禁

註曰掄猶擇也不禁者山林國之有不拘日也

○春秋之斬木不入禁

註曰非冬夏之時不得入所禁之中斬木也斬四野之木可 疏曰上文據國家使工取擇木故非冬夏亦得入山林此據萬民取木故十月入山春秋之斬木不入禁

凡竊木者有刑罰

若祭山林則為主而脩除且蹕

為主主供時用相禮儀也脩除治道路場壇 疏曰此山林在畿內王國四方各依四時而祭 相息亮

反

若大田獵則萊山田之野及弊田植虞旗于中致禽而珥焉

註曰萊除其草萊也弊田田者止也植猶樹也田止樹旗令獲者皆致其禽而校其耳以知獲數也山虞有旗以其主山得畫熊虎其仞數則短也鄭司農云珥者取禽左耳以效功也大司馬職曰獲者取左耳疏曰大田獵者謂王親行珥音二

○林衡掌巡林麓之禁令而平其守

註曰平其守者平其地之民守林麓之部分 疏曰
此林衡兼麓者以爾雅山足曰麓雖連於山山虞不
掌以麓上有林故屬林衡也

○以時計林麓而賞罰之

註曰計林麓者計其守之功也林麓蕃茂民不竊盜
則有賞否則罰之

若斬木材則受灋于山虞而掌其政令

註曰瀘萬民入出時日之期

○川衡掌巡川澤之禁令而平其守以時舍其守犯禁者執而誅罰之

註曰舍其守者時案視守者於其舍申戒之 疏曰

川注瀆者皆是也水鍾曰澤澤與川不同官今川衡兼云澤者澤與川連者則川衡兼掌之謂若濟水溢為滎澤滎澤則與濟連則管濟川者兼滎澤掌之如此之類皆是 滎音滎

祭祀賓客共川奠

註曰川奠籩豆之實魚鱠蜃蛤之屬 鱠所留反

○澤虞掌國澤之政令為之厲禁使其地之人守其財物以時入之于玉府頒其餘于萬民

註曰其地之人占取澤物者因以部分使守之以時入之于玉府謂皮角珠貝也入之以當邦賦然後得取其餘以自為也入出亦有時日之期 疏曰以時入之于玉府頒其餘于萬民亦據中所出入玉府者

多故特言之無妨山虞川衡之等亦入玉府互見其義也萬民入澤雖無正文案王制獺祭魚然後虞人入澤梁草木零落然後入山林則萬民入澤可同時凡祭祀賓客共澤物之奠

註曰澤物之奠亦籩豆之實芹苽菱芡之屬喪紀共其葦蒲之事

註曰葦以闔墻蒲以為席

若大田獵則萊澤野及弊田植虞旌以屬禽

註曰澤虞有旌以其主澤澤鳥所集故得注析羽
疏曰案山虞致禽之義謂輸之於公當致之於虞旗
之中而珥焉以効功此屬禽者謂百姓致禽訖虞人
屬聚之別其等類每禽取三十焉致與屬不同山虞
澤虞文皆不足互見為義也

陳君舉曰古者金玉之所出皆掌之王官侯國不
得擅而有也闕譏所禁皆歸之公上侯國不得擅
而私也是以名山大澤畿外不以封列土之諸侯

畿內不以頒祿仕之王臣皆天子使吏治之而納其貢賦諸侯自食稅田之外餘不敢過而問焉蓋先王不以予諸侯之意所以抑制其強而防閑其侈心也考之周禮凡山澤之數司書掌之以計吏治山澤之賦大府掌之以待邦用九州之川浸山藪職方掌收天下之圖而諸侯無所隸焉至於伯禽侯于東魯而錫之山川乃天子之加賜是固異恩而非可以例觀也人謂周制山林川澤有虞衡

之官為之厲禁疑若專利於上而無遺利在民矣
攷之山虞令萬民時斵材有期日未嘗不與民共
之而有司特禁其不使戕賊而已澤虞則使人守
其財物以時入于玉府則實為民守之王官特以
其賦入于玉府而推本先王領於王官之意蓋使
侯國不得以障管云爾非不知與民共財也周德
既衰凡王國所恃者諸侯皆得專利之齊幹山海
之藏晏子告之以山澤各有所守不可為也是猶

知守先王之灋至於桃林之塞古函谷也晉守之
郇瑕之地古解池也晉實有之凡天下之塞邑皆
不領於王官而惟私意是取春秋之作於鄭不系
虎牢於衛不系楚邱其類非一蓋所以別天下之
重慮侯國擅而兼之也 予音與塞音賽解音懈
○迹人掌邦田之地政為之厲禁而守之

註曰田之地若今苑也

凡田獵者受令焉

註曰令謂時與處也 疏曰受令者謂夏官主田獵者

○禁麋卵者與其毒矢射者

註曰為其天物且害必多也麋麋鹿子 疏曰此謂

四時常禁 麋音迷

○升人掌金玉錫石之地而為之厲禁以守之

註曰錫釧也 易彥祥曰天地之寶生於山澤金玉

錫石之貴饑不可食寒不可衣先王不盡以予民設

之官為厲禁以守之非私之也上以資邦用下以使
斯民之棄末厚本而已 非音礦釧以忍反予音與

若以時取之則物其地

句圖而授之

註曰物地占其形色知鹹淡也授之教取者之處

○巡其禁令

註曰行其禁明其令

○角人掌以時徵齒角凡骨物於山澤之農以當邦賦
之政令

註曰山澤出齒角骨物大者犀象其小者麋鹿 陳
及之曰自此下凡所謂山農澤農蓋平時以射田獵
取締綌及染草為業者非此則不徵 坡謂自此至
掌蜃皆閭師山澤之貢也言賦者疏云賦其總名是
也平地無它產其農惟貢九穀而已此農近山澤有
是骨物齒角採而入官雖不貢穀以此當之故云以
當邦賦也

○以度量受之以共財用

註曰骨入漆浣者受之以量其餘以度度所中浣

戶翫反度上如字下待洛反中丁仲反

○羽人掌以時徵羽翮之政于山澤之農以當邦賦之

政令

註曰翮羽本 疏曰此羽人所徵羽者當入於鍾氏

染以為后之車飾及旌旗之屬也

○凡受羽十羽為審百羽為搏十搏為縛

註曰審搏縛羽數束名也爾雅曰一羽謂之箴十羽

謂之縛百羽謂之緡其名音相近也一羽有名蓋失之矣 搏音篆縛音衮緡古本反

○掌葛掌以時徵絺綌之材于山農凡葛征徵草貢之材于澤農以當邦賦之政令

註曰草貢出澤蒞紵之屬可緝績者 疏曰絺綌之材即葛是也又云凡葛征者總結之也

○以權度受之

註曰以知輕重長短也 蒞苦迥反

○掌染草掌以春秋斂染草之物

註曰染草茅蒐橐蘆豕首紫茝之屬

○以權量受之以待時而頒之

註曰權量以知輕重多少時染夏之時 蒐音搜茝

音列

○掌炭掌灰物炭物之徵令以時入之

註曰灰炭皆山澤之農所出也灰給澣練炭之所共

多

○以權量受之以共邦之用凡炭灰之事

○掌荼掌以時聚荼以共喪事

註曰共喪事者以著物也既夕禮曰茵著用荼

○徵野䟽材之物以待邦事凡畜聚之物

註曰荼茅莠䟽材之類也因使掌焉徵者徵於山澤

入於委人

○掌蜃掌斂互物蜃物以共闔壙之蜃

註曰互物蚌蛤之屬闔猶塞也將井椁先塞下以蜃

禦濕也鄭司農說以春秋傳曰始用蜃炭言僭天子也

○祭祀共蜃器之蜃

註曰飾祭器之屬也鬯人職曰凡四方山川用蜃器春秋定十四年秋天王使石尚來歸蜃蜃之器以蜃飾因名焉鄭司農云蜃可以白器令色白

○共白盛之蜃

註曰盛猶成也謂飾牆使白之蜃也今東萊用蛤謂

之又灰云 盛音成又音釵

○園人掌園游之獸禁

註曰園游園之離宮小苑觀處也養獸以宴樂視之禁者其蕃衛也鄭司農云園游之獸游牧之獸

○牧百獸

註曰備養衆物也今掖庭有鳥獸自熊虎孔雀至於狐狸鳬鶴備焉

祭祀喪紀賓客共其生獸死獸之物

吳氏曰生獸死獸之物獸人既共之而圉人又共之
蓋獸人共者田獵所獲也圉人共者苑囿所養也

○場人掌國之場圃而樹之果蓏珍異之物以時斂而
藏之

註曰果棗李之屬蓏瓜瓠之屬珍異蒲桃枇杷之屬
疏曰場圃連言場圃同地耳春夏為圃秋冬為場
其場因圃而為之故并言之也 坡謂閭師任圃以
樹事貢草木此場人又掌之者此官之斂國圃所樹

也閭師之徵百姓所貢也

凡祭祀賓客共其果蓏享亦如之

疏曰享謂祭祀宗廟二灌後君迎牲納之於庭時后夫人薦朝事之豆籩豆籩中有果蓏之物故云享亦如之若然上言祭祀餘祭祀也

○廩人掌九穀之數以待國之匪頒賙賜稍食

註曰匪讀為分分頒謂委人之職諸委積也賙賜謂王所賜予給好用之式稍食祿廩疏曰廩人掌米

倉人掌穀今云九穀者以廩人雖專主米亦兼掌穀也天子有御廩單云廩則平常藏米之廩此不言御廩則廩中可以兼之矣 食音嗣予音與

以歲之上下數邦用以知足否以詔穀用以治年之凶
豐

數猶計也詔詔告在上用穀之灋項平甫曰以歲之升降得穀之多少計國之所用多則足少則否乃詔在上用穀之隆殺以治年之凶豐故年適豐雖粒米

狼戾不侈於有餘年適凶雖饑饉薦臻不苦於不足則以有治之術也 殺所賣反下同

凡萬民之食食者人四鬴上也人三鬴中也人二鬴下也

註曰此皆謂一月食米也六斗四升曰鬴 疏曰此謂給萬民糧食之灋故云凡萬民之食食者謂民食國家糧食者

○若食不能人二鬴則令邦移民就穀詔王殺邦用

註曰就穀就都鄙之有者殺猶減也 黼音輔

凡邦有會同師役之事則治其糧與其食

註曰行道曰糧謂糒也止居曰食謂米也 糒音備

大祭祀則共其接盛

註曰接讀為一扱再祭之扱扱以授春人舂之大祭祀之穀藉田之收藏於神倉者也不以給小用 疏曰此即廩人兼掌御廩所藏藉田之收以共祭祀之用者也 接音扱扱初洽反盛音成

○舍人掌平宮中之政分其財守以灋掌其出入

平謂平其給米之多少也政謂用穀之政也財即米也喪大記云納財朝一溢米亦謂米為財分其財守者計其用穀之數分送宮正內宰使守而頒之也出謂米出於廩人以出給入謂其有空缺則還入廩人皆當以灋不可虛也

凡祭祀共簋簠實之陳之

簋內圓外方簠內方外圓皆受斗二升儀禮公食大

夫簋盛稻粱簋盛黍稷祭祀言凡則天地宗廟大次
小祭皆有黍稷 食音嗣下同盛音成

賓客亦如之共其禮車米芻米芻禾

註曰禮致饗餼之禮 疏曰亦如之者亦有簋簋實
之陳之之事言實之陳之則據饗餼及饗食之時也
喪紀共飯米熬穀

註曰飯所以實口不忍虛也君用粱大夫用稷士用
粱皆四升實者唯盈熬穀者錯于棺旁所以惑蚍蜉

也喪大記曰熬君四種八筐大夫三種六筐士二種
四筐加魚腊焉 飯扶晚反虵鼻夷反蜉音孚
以歲時縣種陸之種以共王后之春獻種

註曰縣之者欲其風氣燥達也鄭司農云春王當耕
于籍則后獻其種也后獻其種見內宰職 縣音懸
種直龍反陸音陸

掌米粟之出入辨其物

米六米也六米者九穀之中黍稷稻粱苽大豆六者

皆有米麻與小豆小麥三者無米粟九穀也辨其物別為書也

○歲終則會計其政

註曰政用穀之多少

○倉人掌粟入之藏

註曰九穀盡藏焉以粟為主

○辨九穀之物以待邦用若穀不足則止餘瀘用有餘則藏之以待凶而頒之

註曰止猶殺也殺餘灋用謂道路之委積所以豐優
賓客之屬 殺所賣反

凡國之大事共道路之穀積食飲之具

註曰大事謂喪戎

○司祿

闕

○司稼掌巡邦野之稼而辨種稂之種周知其名與其
所宜地以為灋而縣于邑閭

註曰周猶徧也徧知種所宜之地縣以示民後年種

穀用為灋也 疏曰巡邦野之稼者謂秋熟之時觀之

巡野觀稼以年之上下出斂灋

註曰斂灋者豐年從正凶荒則損若今十傷二三實除減半 疏曰此觀稼亦謂秋熟時

掌均萬民之食而調其急而平其興

註曰均謂度其多少調稟其艱阨興所徵賦 疏曰

平其興者當各計什一而稅不得特多特少也 王

氏曰後世倉廩之官知為國斂儲而已周公於倉廩之下特設司稼周知地所宜種為耕灋以示民使穀之所出自倍巡行年之上下為斂灋以示吏使穀之徵斂不頗又周其急平其興焉此所以異於後世也

○春人掌共米物

註曰米物言非一物

祭祀共其齎盛之米

註曰齎盛謂黍稷稻粱之屬可盛以為簋簠實

賓客共其牢禮之米

註曰謂可以賓筐筥

凡饗食共其食米

註曰饗有食米則饗禮兼燕與食

○掌凡米事

○饌人掌凡祭祀共盛

註曰炊而共之 饌音熾

共王及后之六食

註曰六食六穀之食

凡賓客共其簋簠之實

註曰謂致殮饗

○饗食亦如之

○豪人掌共外內朝冗食者之食

註曰外朝司寇斷獄弊訟之朝也今司徒府中有百官朝會之殿云天子與丞相舊決大事焉是外朝之存者與內朝路門外之朝也冗食者謂留治文書若

今尚書之屬諸直上者 疏曰天子三朝路寢庭朝
是圖宗人嘉事之朝大僕掌之又有路門外朝是常
朝之處司士掌之又有外朝在臯門內庫門外三槐
九棘之朝朝士掌之 冗戎上聲

若饗耆老孤子士庶子共其食

註曰士庶子卿大夫之子弟宿衛王宮者

掌黍祭祀之犬

註曰養犬豕曰黍不於饌人言其共至尊雖其潘瀾

幾餘不可褻也

坡謂冢宰總百官以治舉其要耳其僚屬庶尹皆
經理王宮之政至於明遂生復性以寵綏斯民者
未遑也故設司徒之職焉是職也任大而責重舉
天王作君作師之事而致之于民乃順承天萬物
資生故曰地官也凡此七十八官之序或先或後
各有攸理大司徒長官不待言矣教始於郊里故
自小司徒至此長八職專主六鄉而牧田牛田在

鄉中者故封人牧人牛人充人四職次之亦以牲
者祭事之重也鄉之政有二曰征役施舍曰德行
道藝載師至均人五職詳征役施舍之事也師氏
至媒氏六職詳德行道藝之教也然則教養之道
備矣施之天下何以加茲故曰觀于鄉而知王道
也王國面朝後市王門十二在六鄉之內十二闕
門則臨畿上今次於鄉之下遂之上者市雖在國
容五百里疆界中凡五十里之市皆在焉門闕則

連於市以達貨賄者關市有譏用節為多故司市
至掌節十三職相為一類以次於此遂人至里宰
專及田野之制稼穡之緒與六鄉互見為義旅師
如鄉之間師也稍人如鄉之縣師也委人土均如
鄉之遺人均人也此鄉遂之制豈惟鄉遂與鄉之
封人載師縣師遂之稍人土均通公邑都鄙邦國
之政皆舉之矣草人稻人教民以耕與諫救調媒
諸官道民以善類也土訓之詔地圖誦訓之道方

志與師保之詔嫺悉亦類也若夫山林川澤賦貢之末者而其財用國家於是有取資焉故自山虞至場人十有五職又次之冢宰所列九賦九貢之目盡於此矣賓祭之所取軍旅喪紀之所共膳羞祿廩凡為九式用財者將於是乎在故廩人至橐人八職終焉斯其先後本末或以內外或以羣分單舉以見義互文以相足錯其一則非倫類分之为二者未審其條貫之同歸也或曰司徒敷教也

而教職惟鄉官師保等十數人耳其間所指理者
養民之事居多焉先儒疑為司空之錯簡將無信
然否也是不然夫先王之世辨物居方秀者為士
而樸者為農下及工商各有常居皆有守灋使之
父以此教其子兄以此教其弟習其耳目而定其
心思閑其道藝而世其家業無非神道設教之深
意豈必東膠西序始名教哉抑又聞之孟子曰無
恒產而有恒心者惟士為能若民則無恒產因無

恒心苟無恒心放僻邪侈無不為已故制民之產
然後驅而之善此所謂物畜然後有禮不養則不
可動者也天下不由養而能教者希矣力能為長
厚之行而民者寔也左右曲成君相不先則士農
工商生者不得其情死者不盡其常相與矍矍然
喪其降衷秉彝之心其鈍頑無耻者固已率而歸
於乖戾悖逆不可復制即常性未移者亦頽墮委
靡消沮而不復振嗚呼道之不行從可知矣司徒

一篇教養相侔蓋聖人酌乎天理人情之安措之
天下既竝舉而相成著之為經亦貫通而匪二是
是乃盡倫盡制之道也何疑其錯簡哉然則司空
所司之職者何與竊疑周禮為書委曲周詳無不
備者獨至壇兆廟社之灋井田長廣之方附庸間
田所餘之多寡山林川澤城郭宮室涂巷三分之
乘除天時有生耕穫何以無失其序地理有宜高
下何以無拂其性山川沮澤民居有度焉興事任

力遠近有量焉宮室之制器皿之宜舟車之用凡
數事者雖略見於諸官未詳其規度意司空之職
必如前所云者而春秋戰國之世強凌弱下替上
開阡陌盡地力相兼以力相侈以僭司空一篇必
最其所深病而急欲去其籍者也其失蓋已久矣
若夫竄綴紛紜離散全經區區之心則病其援周
公以從已也

周禮述註卷十